

弘

簡

錄

弘簡錄卷一百十九

皇清翰林院侍讀學士四世孫遠平校閱

功臣 宋三之六

狄青 孫節蔣偕

張玉

賈逵

郝質

竇舜卿

劉昌祚

燕達

楊燧

宋守約 子球

周美 孫永清

种世衡 子古謬直孫朴師道師中

姚兕 弟麟子雄古

劉舜卿

狄青字漢臣汾州西河人善騎射初隸御馬直選為散直會討趙元昊擇衛士從邊以青為延州指使行軍常為先鋒凡四年大小二十五戰中流矢八破金湯城略宥州屠哱咩歲香毛奴尚羅慶七家口等族所燔積聚收帳落生口前後無算又城橋

子谷築招安豐林新砦大郎等堡。皆扼賊要害。嘗戰安遠遇禍。將屢敗寇。復大至。青方被創甚遽。起馳赴之。衆爭爲用。賊皆披靡。莫敢當。經略判官尹洙薦於韓琦。范仲淹曰。此良將材也。二人一見。奇之。待遇特厚。仲淹以左氏春秋授之。曰。將不知古今。匹夫勇爾。青折節讀書。悉通秦漢以來將帥兵法。由是益知名。以功累遷西上閣門副使。秦州刺史。涇原路副都總管。經略招討副使。至捧日天武四廂都指揮使。領惠州團練。眉州防禦使。數戰有功。元昊稱臣。徙真定。副都總管。歷殿前都虞候。保大安遠二軍節度。觀察。留後。馬步軍副都指揮使。俄領彰化軍節度。使知延州。樞密副使。皇祐中。廣源州蠻僂智高反。陷邕州。嶺外騷動。楊略等師久無功。又命孫沔。余靖爲安撫使討賊。仁宗猶以爲憂。青表言。臣起行伍。非戰伐無以報國。願得蕃落騎數。

百益以禁兵。羈賊首致闕下。帝壯其言。除宣徽南院使宣撫荆
湖南北路提舉廣南經制盜賊事。詔鄜延環慶涇原路擇將落
廣銳軍從赴廣南。置酒垂拱殿遣行。先是蔣偕張忠皆輕敵死。
鈴轄陳曙乘青未至。輒以步卒八千犯賊。潰于崑崙關。殿直袁
川等皆遁。軍聲大沮。青歎曰。令之不齊。兵所以敗也。時僂寇還。
據邕州。青合孫沔余靖兵次賓州。戒諸將毋妄與鬪。聽吾所爲。
晨會諸將堂上。掛曙起并名川等三十人。按以敗亡狀。驛出軍
門。斬之。沔靖相顧。胎聘諸將股栗已乃頓甲。令軍中曰。休十日。
覘者還以爲兵未卽進也。明日遠傳令整步騎。自將前軍。沔將
次軍靖殿後馳。一晝夜絕崑崙關。奪賊險而陣。賊駭。悉衆出戰。
氣銳甚。前鋒孫節中創而沒。沔等懼失色。青執白旗麾蕃騎兵。
縱左右翼出。賊不意。大敗之。追奔五十里。斬首數千級。生擒賊

五百餘。獲其黨黃師宓。僂建中智中及僞官屬死者百五十人。智高夜燒城遁去。逖明拔兵入城。獲金帛鉅萬。雜畜數千。招復俘脅老壯七千二百。咸慰遣之。梟師宓等。邕州城下斂屍築京觀于城北隅。時賊屍有衣金龍衣者。衆謂智高已死。欲以上聞。青曰。安知非詐耶。寧失智高。不敢欺朝廷也。捷聞。上顧宰相曰。速議賞。綬則不足以勸矣。遷護國軍節度使河中尹。凱還拜樞密使。賜第敦教坊。優進諸子官秩。始交趾願出兵助討。靖許以厚賞。青奏。貪得忘義。且假外兵以除內寇。非我利也。倘因啓亂。何以禦之。請罷交趾助兵。至是咸服其有遠略。在樞密四年。每出士卒輒指目相矜。詡其家狗。忽生角。數有光怪。言者請出之於外。以示保全。不報。嘉祐中。京師大水。移家相國寺。行止殿上。人情頗疑。廼加同中書門下平章事。出判陳州。每以盛滿。

爲戒明年二月疽發薨卒年五十帝發哀贈中書令諡武襄青
事親孝奉母充國太夫人侯氏備極榮養尤喜推功將佐始與
孫河破賊謀略一出於青賊平悉以經制餘事委河若不經意
者河始歎其勇旣而服其量自謂不如也後尹洙貶死青亦悉
力賜其家二子諮誅數有戰功並爲閤門使神宗考次近世將
帥稱其名勳華裔深沈有智略能以畏慎保全終始慨然思之
命取其畫像入禁中御製祭文遣使祀以中牢孫節開封人
少隸軍籍以才勇補右侍禁與青同在延州數攻破敵砦有功
累遷西京左藏庫副使及青討智高隸麾下爲前鋒戰歿特贈
忠武軍節度留後封妻仁壽郡君官其子二人從子三人給諸
司副使奉終其喪 蔣偕字齊賢華州鄭縣人幼貧立志父病
割股以療登進士補韶州司理參軍遷秘書郎爲大理寺詳斷

官密州豪王澥使奴殺一家四人當論死宰相陳堯佐欲寬澥
偕持之不從陝西用兵數上書論邊事遷秘書丞通判同州專
理錢糧逾年改沿邊計置青白鹽使龐籍仲淹薦陞北作坊副
使環慶路兵馬都監歷知汾涇原三州屬戶數輩寇鈔邊民偕
命斬之盜爲止息遷作坊使鈐轄名珠康奴諸族數爲偕潛兵
進勦斬首四百擒酋豪焚帳落獲馬牛羊千計所俘皆剗割磔
裂于庭語笑自若徙華州兵馬鈐轄湖南蠻唐和內寇徙潭州
鈐轄賊平歷知忻冀恩三州除宮院使領韶州刺史至團練使
廣南東西路鈐轄馳傳至賀州太平場戰士未集夜襲賊營被
殺贈武信軍節度觀察留後 張忠開封人率府副率致仕餘
慶之子初隸龍騎備征以殿殺軍校坐配鼎州復招隸龍猛軍
以材武補三班借職陝西總管司指使數攻破堡砦殺劇賊張

海郭遛山從平恩州功第一累遷如京使資州刺史歷真定高陽關京東西路兵馬鈐轄就移廣東領英州團練使嘗語其下我十年前一健兒以戰功至此若曹勉之臨陣不介而馳手拉賊帥二人馬陷淳不能奮遂中標槍死封其父左監門大將軍賜第一區給半俸終身母河內郡夫人弟愿右班殿直閤門祗候官其子永壽永吉永德及壻劉錚凡四人長女亦封靖河縣君

張玉字寶臣保定人以六班散直隸青磨下築青澗招安砦遇夏兵馳鐵騎挑戰玉獨身持鐵簡出鬪取其首及馬回軍中因號張鐵簡仁宗聞之以爲本路同巡檢從征儂寇抵歸仁驛賊列三銳陳以逆官軍小卻玉率右廂突騎橫貫賊壘遂大潰擢爲廣西鈐轄徙大名進龍神衛四廂都指揮使爲副都總管夏

人攻大順城。王乘夜率兵三千擊之。賊驚潰而去。遷陵州團練
昭州防禦使從涇原熙寧中。慶卒叛。王襲逐于石門。斬二百人。
王韶開熙河。轉宣州觀察使。河北置二十七將。以爲第一終馬
步軍都虞候。贈建雄軍留後。

賈逵。葭城人。少孤。母嫁。初隸拱聖軍。卒至殿前班。換西染院副
使。從狄青征智高。爲右軍先鋒。戰於歸仁驛。青誓衆不待令而
舉者。斬逵。念兵法。先據高者勝。左將已戰死。吾兵氣沮。易敗。苟
復待命。賊乘勝先登。吾事去矣。卽引軍趨山。既定。賊至。連磨衆
馳下。仗劒大呼。斷賊爲二。首尾不相救。遂潰。旣戰。逵詣青請罪。
青拊其背。勞之。使入邕州城。括公私遺墜。固辭。時將校多竊金
寶。獨逵無所犯。遷院使。領嘉州刺史。奉母歸養。尋轉秦鳳路鈐
轄。辭以母老。不許。賜母冠帔。泰山多巨木。逵引兵往來斬伐。羌

人馳至盡地立表約決勝負逵引弓迎三中的羌下馬拜伏徙并代路專主管麟府軍馬熟戶散處邊關苦於寇略逵差度遠近聚爲二十七堡次第相望自是害息壽鐵爲的激種豪使射久皆成勁兵一夕火發左右白寇至逵臥不應徐問之果邊人燭遺物也復徙秦鳳去始十日代者郭恩敗追議其能連擢捧日天武四廂都指揮使馬步殿前都虞候歷涇原高陽關麟延路副總管領利州觀察使入累馬步軍副都指揮使都城西南水暴溢注安上門英宗遣逵督護亟囊土塞門乃止議者欲穴隄以泄勢逵請觀水所行諭居民徙高處然後決之久之復出總鄭延兵延州夾河舊有兩城因元昊據險幾不能守逵請築保障於伏龍山九州臺之間與城相望人以爲便轉昭信軍節度觀察留後奏种諤欲妄興邊事自以爲功所降綏州人千二

百戶冒爲萬三千不可不察元豐初拜建武軍節度終殿前都指揮使年六十九贈侍中諡武恪

郝質字景純介休人少從軍挽彊第一充殿前行門換供奉官爲府州駐泊都監主管麟府軍馬與田肅將兵護軍須餽麟州道逢夏騎數千寇鈔質先驅力戰獲人馬數百又出行邊至柏谷遇敵塹道以阻官軍與肅禦之於寒嶺下轉鬪逐北遂修復寧遠諸柵以扼賊衝前後有功宣撫杜衍安撫明鎬條上其狀迨遷內殿承制并代路都監賈昌朝又薦爲路鈐轄使討貝州賊文彥博遣小校藺千守河上亭質轉使千往他營度戰具千去亭爲賊焚彥博怒將斬千質固請願代千死彥博壯其義兩釋之自此益知名賊平遷六宅使歷高陽關定州并代鈐轄駐泊副都部署龍神衛捧日天武都指揮使馬軍殿前都虞候領

賀州刺史英州團練眉州防禦使奉詔城豐州進歷馬步軍副都指揮使宿州觀察使自爲官不上閤閣從微至貴遷皆以功英宗進武昌軍節度觀察留後安德軍節度使入授殿前副指揮使神宗易節慶武軍爲都指揮使元豐元年卒帝親臨其喪贈侍中諡武莊爲人自奉簡儉食不重肉篤于信義御軍有紀律犯者不貸而享犒豐渥公錢不足出已俸助之肫後不振而死爲表揭前功官其一孫在并州與朝士董熙善約爲婚姻熙死家貧無依質竟以女歸董氏

竇舜卿字希元安陽人父爲客省使善射得其家法蔭授三班奉職監平鄉酒稅有僧欲傳以化金之術謝曰吾祿足養親不願學也辟府州兵馬監押夏人犯邊事急舉烽求援於大將王凱凱不應舜卿提州兵出戰勝之明日經略使問狀凱懼要以

同出爲報舜卿驩然許之不自爲功移青淄路都監海盜執博
昌鎮官吏肆剽掠舜卿募士三百悉擒之使契丹主客馬祐置
酒請射發輒中的湖北徭彭仕義叛徒爲鈴轄兼知辰州建議
築州城不擾而辦仕義欲內附脅於富州蠻將萬年州舜卿選
壯卒奮擊蠻矢石交下卒蒙盾直前發强弩射殺萬年州於石
狗崖下遂拔之左右欲盡勦其衆舜卿不許引兵入北江仕義
果降罷康州刺史加龍神衛捧日天武四廂都指揮使殿前馬
軍都虞候領邕州觀察使歷邠寧環慶路副都總管熙寧中丐
易文階改刑部侍郎求退提舉嵩山崇福官以光祿大夫致仕
卒年八十八諡康敏

劉昌祚字子京真定人父賀戰沒定州錄爲右班殿直主秦州
威遠砦青唐聚兵鹽井經年不散昌祚奉帥命往詰曰聞漢欲

取吾井鹽昌祚曰國家富有四海何至與汝爭此與曾俱來犒
賚之惓然去遷西路都巡檢使遼還神宗臨試騎射授通事舍
人夏人引萬騎寇劉溝堡昌祚騎二千出援卒遇賊力戰不解
夏人突而前抽矢一發殪之餘衆悉遁李師中上其功言西事
以來以寡抗衆未有其比移知階州累平母家疊州等族轉作
坊使充熙河路都監從王中正入蜀破筆架羌加皇城使領榮
州刺史轉秦鳳路鈐轄尋加西上閫門使累州團練知河州元
豐四年擢涇原副都總管從高遵裕西征詔與總管姚麟率蕃
漢兵五萬出胡盧川次磨齊隘夏衆十萬扼險不可前昌祚挾
兩盾先登夏人小却師乘之斬首千七百級進次鳴沙川取其
要害遂薄靈州城門未及閤先鋒奪門幾入遵裕領環慶兵尚
未至馳使諭止之是夕慶兵始距城三十里而軍遇敵接戰昌

祚遣數千騎赴援遲明賊退謁遼裕裕怒其援遲欲誅之又欲奪其兵付麟麟不敢受乃已明日遣昌祚巡營凡所得馬糧悉奪之涇師忿而譟旣而圍城不能下夏人決七級渠灌遼裕軍遂潰南還復命涇師殿昌祚手劒水上待衆濟然後行至渭州糧盡士爭入無復行伍坐貶永興軍鈐轄明年復徙涇原加龍神衛四廂都指揮使知延州時永樂方陷士氣不振昌祚大修馬政校軍中技擊優者給之自義合至德靖砦綿亘七百里堡壘疏密不齊烽燧不接復度屯戍險易地望遠近事力強弱立爲定式上之朝夏人寇塞門安遠砦拒破之殺其統軍葉忞麻咩叱埋二人蓋始謀攻永樂者圖其形以獻帝喜遣近侍勞軍哲宗立進殿前馬步軍都虞候出爲雄州團練使知渭州故時授弓箭手人田二頃有馬者增給之其後馬死不補據地自若

及是按舉其法耗馬遂復又括隴山閒田萬頃募士得五千別置將統之勁悍出諸軍右朝廷歸夏人四砦昌祚言其不可再遷殿前副都指揮冀州觀察使武康軍節度使卒年六十八贈開府儀同三司諡毅肅爲人氣貌雄偉善騎射箭山百步之外夏人得者輒以爲神持歸奉之所著射法行於世

燕達字逢辰開封人兒時有志於軍陣行列既長容體魁梧善騎射以材武隸禁籍授內殿崇班爲延州巡檢戍懷寧砦夏騎三萬薄城竟日戰不決達所部止五百人躍馬奮擊所向披靡摧鄜延都監熙寧三年夏人寇大順城引兵擊走之帥兵深入敵境九戰皆以勝歸羅兀棄走遣達援取輜重爲賊所邀且戰且南神宗嘉其孤軍禦敵累遷西上閤門使領英州刺史爲秦鳳副總管破河州羌遂降木征真拜忠州刺史龍神衛四廂都

指揮使郭達招討安南爲行營馬步軍副都總管入辭上諭卿
名位已重不必親冒矢石第激勵將士可也達頓首曰臣得憑
威靈滅賊雖死何憚初度嶺聞前鋒遇敵苦戰欲往援有偏校
言當先安營然後進罵曰彼戰已危詎忍緩耶敢言安營者斬
亟卷甲趨之士皆自奮傳呼太尉來蠻驚潰卽定廣原師次富
良江蠻熾船南岸欲戰不得默計兵法致人而不致於人吾示
之以虛彼必來戰已而蠻果來擊之大敗乃請降師還拜榮州
防禦使時主帥得罪已獨蒙賞乞同責不聽元豐中遷金州觀
察使馬步軍都虞候超授副都指揮使武康軍節度使哲宗立
徙節武信卒贈開府儀同三司諡毅敏本起行伍喜讀書神宗
以其忠實可任每燕見未嘗不從容嘗問用兵當何先對曰以
愛爲先帝曰威克厥愛可乎達曰威非不用也要莫先愛耳帝

普之。

楊燧開封人幼善騎射應募隸軍籍從征貝州穴城以入爲叛兵所傷同行劉順救之得免賊不論功第一補神衛指揮使從征儂蠻數挑戰手殺數十人衆乘之大捷擢萬乘都指揮領榮州副練使京城左廂巡檢因救濮宮火英宗識之卽位遷鄧州防禦使步軍都虞候時順已死訪恤其家甚至故人妻子貧不能活者收養之人服其義尋歷環慶涇原鄜延三路副都總管至馬軍副都指揮使擢容州觀察寧遠軍節度使終殿前副都指揮使贈侍中諡莊敏

宋守約開封酸棗人以舊爲左班殿直至河北緣邊安撫副使遷知恩州仁宗諭以亂後當思撫御之意對曰恩本與他郡等爲守者槩以反側待之故人心不自安臣願盡力徙益州路鈴

轄累遷文州刺史康州團練使知雄州歷龍神衛捧日天武都
指揮使殿前馬步軍都虞候入宿衛遷洋州觀察使衛兵以給
粟陳謹而譟執政欲付有司守約遣一牙將語曰天子太倉粟
不陳何爲我不貸汝衆懼而聽命俄進步軍副都指揮使威武
軍留後神宗因禁旅驕惰詔令簡練率先推行約束嚴峻帝密
戒以太急對曰臣爲陛下明紀律不忍使恩出於臣而怨歸陛
下帝喜之故事當郊之歲先期籍士卒之兇悍者配下軍以警
衆當受糧而倩人負者罰久而浸弛至是悉舉行之所居肅然
無人聲至蟬噪於庭亦擊去其嚴如此卒年七十一贈安武軍
節度使諡勤毅子球以蔭幹當禮賓院條奏秦州養馬四弊
羣牧使用其議馬商便之再使高麗密訪山川形勢風俗好尚
使還圖紀上之神宗稱善進通事舍人西上閣門使樞密副都

承旨卒于官爲人謹密朝日所聞上語雖家人不以告帝崩告
哀契丹至則使易吉服球口通和歲久憂患是同大國安則爲
之契丹不能奪

周美字之純靈州回樂人少隸朔方軍以材武稱趙保吉陷靈
州美棄其族間走京師隸禁軍上其所服精甲詔藏軍器庫涇
州之役慷慨自陳願假數騎縛契丹將至闕下真宗壯之令入
宿衛至都虞候天聖初德明部落寇平涼方渠美復出戍邊與
州將追戰破之于仙井原烏崙河斬首甚衆累遷天武都虞候
夏竦薦提供備庫使延州兵馬都監夏人破金明諸砦美請于
范仲淹亟完金明因屬美復城之數日賊果來陣于延安城北
三十里美率衆二千力戰抵暮援兵不至乃使人持炬從間道
上山四面張旗幟大譟賊懼走獲牛馬橐駝鎧甲數千遂築萬

安城而還賊復寇金明美引兵由虞家堡並北山而下敵引卻
遷文思院使改東路都巡檢敗敵于金湯城焚其族部元昊大
入諸將會議攻討种世衡請齎三日糧直搗敵穴美言彼知吾
來必設伏待我不如間道掩其不意不聽世衡等果無功美獨
以兵西出芙蓉谷大破敵人未幾復略土塹砦美迎擊于野家
店追北至拓跋谷大敗其衆以功遷右驤使軍還築柵于葱
梅官道谷以據敵路益修營田歲收穀六千斛復率衆由廳子
部西濟大理河屠割萬多移二百帳焚其積聚罷籍仲淹交薦
除鄜延路兵馬都監領賀州刺史上命出所藏甲加飾黃金遣
使卽軍中賜之又破敵于無定河乘勝至綏州殺其酋豪焚廬
帳獲牛馬羊駝器械三百因城龍口平砦敵引精騎數千來襲
美從百餘騎馳擊破之加本路鈐轄至副總管歷龍神衛捧日

天武四廂都指揮使通州刺史陵州團練使安定之役謀報敵
數萬將至經略使遣楚建中分諸將兵趣成黑水以待諸將憚
敵且至多不肯與兵獨美出兵二千與之敵亦引去每邊皆至
諸將各擇便利獨美未嘗辭難然所向輒克諸將以此服之更
侍衛親軍殿前都虞候眉州防禦馬步軍副都指揮遂州觀察
使鄺延副總管名還收耀州卒贈忠武軍節度使諡忠毅自元
昊反諸將多不利美前後十餘戰平族帳二百招降種落甚衆
未常敗剽城清水安定黑水佛堂北橫山乾谷土明柳谷雕巢
盧兒原安堡砦十一凡得祿賜多分麾下有餘悉饗勞之及死
家無餘貲子蚤卒 孫永清字肅之以蔭從仕隴籍言其忠勇
加開門祗候押時服賜夏國受賜不肅廷詰之夏人惶恐謝遷
通事舍人渭州鈐轄渭兵勁而行陣不講永清訓以李靖道法

勸習部伍帥蔡挺嘉其整圖上之詔推於諸道移知德順軍夏
衆入寇擒其酋呂效忠夜率勇士疾馳百里擣賊巢穴斬首三
百級俘數千人獲橐駝甲馬萬計城中無知者敵盜耕並禁
地永清拓籍數千頃置射士二千護民耕穫敵有降者引入帳
下待之不疑多得其死力徙秦鳳路鈐轄河北公邊安撫副使
知代州契丹無名求地朝廷命副韓縝分畫永清上章陳利害
言疆境不可輕與人俄以母病辭歷高陽關定州涇原路鈐轄
知涇與保州又爲定州路副總管終東上閤門使

种世衡字仲平放兄子少尚氣節昆弟欲析貲悉推與之以放
蔭補將作監簿累遷太子中舍知涇陽里胥王知謙姦利犯法
會赦世衡恃杖其脊而後釋之改通判鳳州章獻后甥王蒙正
爲州將嘗干世衡以私不聽乃誘知謙構訟而陰助之坐流竇

州弟世材上一官贖爲孟州司馬久之舉士李紘宋綬狄瑑列
言其誣除衛尉寺丞監隨州酒判同鄆二州時西邊用兵守備
遼澗世衡建言延安東北二百里。有故寬州廢壘。請興築以當
寇衝。朝廷從之。命董其役。夏人屢出。爭世衡曰。戰且築。卒城之。
然地險無泉。不可守。世衡令石工屑石一沓。酬百錢。鑿地百五
十尺。始得泉。城成。賜名青澗。遷內殿崇班。知城事。開營田二千
頃。募商賈以本使通貨。取贏。城遂富饒。間出行部族慰勞。會長
或解所服帶與之。常因會客有得敵情來告。卽予以飲器。以是
屬羌皆樂爲用。再遷洛苑副使。知環州。專以信結諸羌。嘗夜與
羌人慕恩部落飲。出侍姬佐酒。慕恩悅。侍姬卽以道之。由是得
其死力。諸部有貳者。使討無不克。其後百餘帳皆自歸。因令諸
族置烽火。有急。則介馬以待。葛懷敏敗。率羌兵數千往援。無敵。

後者嘗課吏民射觀其中否凡過失罪戾辭請某事輒視以爲
與奪由是人人皆精於射敵不敢近遷東染院使環慶路兵馬
鈐轄會有疾范仲淹強起與蔣偕營細腰城世衡將所部晝夜
興築城成而卒羌酋朝夕臨青澗及環城畫像祠之凡在邊數
年積穀通貨所至不煩縣官益兵增饋善撫士卒病者遣視食
飲湯劑以故人盡死力云初元昊所親信野利剛浪凌遇乞兄
弟有材謀皆號大王經略龐籍王沿葛懷敏屢謀間之先後遣
持金寶及書往遣不得其要領會剛浪凌詐遣浪埋賞乞娼娘
等三人詣世衡降世衡知其詐因留以爲間使監商稅甚見寵
幸奏以僧王光信爲三班借職改名嵩使資蠟書遣剛浪凌言
浪埋等已至朝廷知汝有向漢心命資旌節授夏州節度使月
給俸錢萬緡且以裘緡畫龜默寓早歸之意浪凌得書大體執

嵩歸元昊囚錮罪中元昊果疑浪陵貳已不聽還所治使其臣李文貴假浪陵書報世衡世衡以白於籍籍名文貴至諭以朝廷開納招拊之意縱使還報元昊得報益信前書竟誅野利兄弟出嵩禮之使與文貴偕來稱臣如舊籍疏言世衡畫策使嵩冒艱險間其君臣請優進嵩官名對進侍禁至閤門祇候詔以其事付史館其後世衡亦贈成州團練使子古謬診皆有將材號曰三種古字大質少慕從祖放爲人不事舉業當仁官辭與其弟時稱小隱父卒錄爲天興尉累轉西京左藏庫副使涇原路都監知原州羌人犯塞古禦之斬級數百築城鎮戎之北以據要害神宗名對還通事舍人官其二弟尋與診破環州折蓋會斬首二千級遷西上閤門副使民有損直鬻田熟羌以避役者古案其狀得良田三千頃丁四千悉剗爲兵歷環慶永興

路鈴轄坐訟范純仁奪一官知寧州徙鎮戎軍又徙邠熙二州卒年七十古明達孝義嘗納官贖弟諤擅興罪張問以父在時所遺田千畝來還不受然世衡受范仲淹知因立青澗功而古以私憾訟純仁士論少之諤字子正以蔭累官左藏副使延帥陸詵薦知青澗城夏酋令陵內附詵欲不納諤勸納之夏人來索詵問所以報諤曰必欲得令陵當以景詢來易乃止景詢中國亡命至彼者也夏將鬼名山部落在故綏州其弟夷山來降諤因誘名山賂以金孟小吏李文喜愛之而許降明山未知也朝廷詔薛向與詵招名山諤不待報悉起所部兵長驅而前圍其帳名山大驚援槍欲鬪夷山呼曰兄已約降何爲如是文喜囚山所受金孟示之名山投槍大慟遂舉衆而南得酋領三百戶萬五千兵萬人將築城詵以無詔召諤還軍次懷遠晨起

方櫛敵衆四萬傳城而陣諤開門以待身爲中軍使偏將燕達
劉甫爲兩翼擊之俘馘甚衆遂城綏州誅劾其擅興下吏貶秩
安置隨州神宗因侯可入見問其事可言諤奉密旨取綏而罪
之何以使人帝悔復其官會韓絳規橫山用爲鄜延鈐轄令將
兵二萬出無定川起河東兵會銀州城成而慶卒叛詔罷師連
責汝州閫練賀州別駕移單華二州絳再相訟其前功復禮賓
副使知岷州董氈將鬼章聚兵洮岷新羌多叛諤襲誅之後從
李憲出塞收洮州下通宗講珠東宜諸城掩擊至大河斬首七
千級遷東上閤門使文州刺史知涇州徙鄜延副總管夏國因
乘常帝召諤入對大言乘常孺子往持其臂以來帝壯之決意
西討擢爲經略安撫副使然憂其輕出使聽王中正節制敵屯
兵夏州諤率本路并畿內七將兵攻米脂降其守將令介訛遇

夏兵八萬來援諤禦之無定川伏兵斷其首尾大破之捷聞羣臣稱賀帝大喜遣中使諭獎遂罷中正諤留千人守米脂進次銀石夏州不見敵士卒飢憊歸罪轉運李稷糧運不繼駐軍麻家平大校劉歸仁衆潰詔令班師猶遷鳳州團練使龍神衛四廂都指揮使其謀據橫山之志未已復遣子朴上其策帝召問擢朴閤門祇候遣徐禧李舜舉往議諤言橫山延袤千里多馬宜稼人物勁悍善於戰鬪且有鹽鐵之利夏人恃以爲生其城壘皆控險足爲守禦今日興功當自銀州始其次宥與夏州三郡鼎峙則已囊括橫山其中矣又次修鹽州則橫山臂兵戰馬山澤之利盡歸中國地勢旣高俯瞰興靈可以直覆巢穴而禧與沈括違其初議請城永樂諤退而嘆曰城之必敗與其喪師而淪異域孰若敗而死此乎旣而永樂受圍觀望不救帝冀其

後效置不問且虞賊至就命知延州年五十七疽發背卒謬善
馭士卒臨敵出奇敵亦畏其敢戰故數有功然詐誕殘忍嘗渡
河猝遇敵紿門下客更其衣乘其馬以免左右有犯立斬或先
刳肺腑坐者掩而飲食自若自熙寧首開綏州後再舉西征皆
其兆謀議者謂謬不死邊事不已 諠字壽翁世衡幼子初從
高遵裕復洮岷平山後羌擢熙河副將習知山川險隘後使青
唐董道遣鬼章迎候境上故爲回任以夸險遠諠命趨便道還
擢路都監自蘭州渡河討賊斬首六百累轉西京作坊使元祐
初知岷州鬼章誘殺景思立益自矜大有窺故土之心使其子
詣宗哥請益兵且結屬羌爲應諠刺得其情請除之詔遣游師
雄就商利害遂與姚兕合兵出討羌迎戰擊走之追奔至洮州
乘晨霧登城執鬼章獻之于朝遷西上閣門使領康州刺史徙

知鄜州夏人犯延安趙禹使統諸將敵聞誼至皆潰去延人謂得誼勝精兵二十萬進熙河路鈐轄知蘭州蘭與通遠皆絕塞不相接腴田多棄不耕誼請城卒諾平以扼衝要遷東上閣門使終保州團練使年五十五誼個儻有氣節喜讀書蒞軍嚴整羣羌畏惕令下死不敢避遇敵度不勝不出故每戰未嘗負衄酋包順包誠恃功驕恣前守務姑息誼至厚待之適小有過將寘之法叩頭伏罪願效命以贖乃使輸金出之及洮州之役二人功最多朴以父任右班殿直積勞至皇城使昌州刺史徙熙河蘭會鈐轄兼知河州安撫洮西沿邊公事至纔二日河南蕃部叛屬羌阿章率他族拒官軍熙帥胡宗回使出討朴以賊鋒方銳且盛寒欲姑徐之宗回馳檄督促不得已出兵遇伏首尾不相應朴殊死戰遂爲所殺以馬負其屍去羌乘勝驅萬騎

迫北有偏將王舜臣善射獨立殿後遇七人介馬先馳舜臣呼曰吾令最先行者眉間柳花引弓三發遂墮三人皆中面餘四人反走矢貫其背萬騎睥眦莫前舜臣因得整衆須臾羌復來自中及西抽矢千餘發無虛者指裂血流至川薄暮乃得脫事聞贈朴雄州防禦使官其後十人弟師道字彝叔少從張載學以蔭補三班奉職試法令易文階爲熙州推官權同谷縣權通判原州提舉秦鳳常平以議役法忤蔡京換莊宅使知德順軍罷入黨籍屏廢十年起爲武功大夫忠州刺史涇原路都鈐轄知懷德軍與夏人焦彥堅議畫境必欲得故地師道曰如言故地當以漢唐爲証恐君疆土益蹙彥堅無以對童貫握兵而西翁張威福見者皆旅拜師道獨長揖而已徽宗召詣闕訪邊事對以妄動生事非計貫徙內郡弓箭手指爲新募帝復訪之

對曰臣恐遠功未立而近擾先及矣帝善其言賜襲衣金帶命提舉秦鳳弓箭手時五路並置官惟師道帝所親擢貫滋不悅遂不敢拜請祠久之知西安州夏人侵定邊築佛口城率師往平之始至渴甚指山之西麓曰是當有水命工求之果得泉累遷龍神衛四廂都指揮洺州防禦使知渭州至纔八日督諸道兵城席葦上方賦工而敵至師道陣於葫蘆河許若將決戰者陰遣偏將出充徑出橫嶺揚言援兵至敵方駭顧揚可世潛軍其後姚平仲擊以精甲襲擊之敵大潰斬獲萬計其酋僅以身免卒城而還又詔師陝西河東七路兵征賊底城既薄城下守備甚固官軍小怠列校有據方牀自休者立斬之屍於軍門曰今日城不下視此衆股髑登城遂潰捷至帝喜進侍衛親軍馬軍副都指揮使應道軍承宣使尋拜保靜軍節度使諫童貫謀

伐燕不聽以爲都統制使盡護諸將師次白溝遼人譟而前士卒多傷師道先令人持一巨挺自防不致大敗遼復遣使來言救災恤患古今通誼如女真之叛本朝亦南朝所甚惡也今射一時之利棄百世之好結豺狼之隣基他日之禍謂爲得計可乎貫不能對師道又勸宜許之貫怒劾以庇賊王黼助貫責爲右衛將軍致仕代以劉延慶未幾敗于盧溝帝思其言起爲憲州刺史知環州復致仕金人南下趣召之加檢校少保靜難軍節度使制置京畿河北聽便宜檄兵食師道方居南山豹林谷聞命卽東過姚平仲有步騎七千與之俱北至洛陽聞幹離不已屯京城下或止勿行曰賊勢方銳願駐汜水以謀萬全師道曰吾兵少若遲回不進形見情露今鼓行而前彼安測我虛實都人知吾來士氣自振何憂賊哉揭勝沿道言种少保領西兵

百萬來。遂抵城西趨汴水南徑過敵營。金人懼。斂游騎守牟駝岡。增壘自衛。欽宗聞其至。喜甚。命開安上門。使李綱迎勞。入見。帝問兵事。對曰。女真不知兵。豈有孤軍深入人境而能善其歸乎。帝曰。業已講好。對曰。臣以軍旅事陛下。餘非所敢知。拜檢校少傅同知樞密院事充京畿兩河宣撫使。悉隸諸道勤王兵。時被病。命母拜許肩輿入朝。下令開京城西南門。聽民出入如常。金人來訴。偏將馬忠斬其兵六人。師道付以界旗。使自爲制。後無敢越伏者。時四方勤王之師二十餘萬。金兵纔六萬。帝信李綱言。非用師不可。乃趣師道戰。而師道欲俟其弟師中至。奏言過春分方可出兵。時相距纔八日。帝以爲緩。會姚平仲援兵亦至。種與姚皆山西巨室。平仲慮功獨歸。種氏請先期襲之。遂及於敗。李綱旣罷。太學諸生并都人數萬。伏闕願見師道。綱詔趣

使彈壓師道乘車至。衆褰簾視之。曰。果我公也。相率聲喏而散。
至師退師道中前議請乘牛濟學之。不從。曰。異日必爲國忠。每
罷爲中太一宮使。中丞許翰請留之上。以爲老難用。令見於殿
門外。師道不語。翰曰。國家有急。詔許訪所疑。公勿以書生之故
不肯談。師道言。我衆彼寡。但分兵結營。控守要地。使彼糧道不
通。坐以持久。決可破也。翰嘆味其言。還奏師道智慮未衰。尚可
用。再命加檢校少師。進太尉。換節鎮洮軍。宣撫河北河東屯于
滑州。實無兵。自隨。道請合關河卒屯滄衛孟滑以防再至。朝論
大敵甫退。不宜勞師。示弱格不用。旣而召還太原。陷又使巡邊。
次河陽。遇王汭。揣敵必大舉。亟請幸長安以避其鋒。大臣以爲
怯。復召還。旣至。病不能見。卒年六十七。帝臨奠。慟哭。贈開府儀
同三司。京師失守。帝始嘆不用其言。建炎中。加贈少保。諡忠憲。

師中字端孺歷知環濱邠秦四州并慶陽府侍衛馬步軍副都指揮領房州觀察使奉寧軍承宣使詔提秦鳳兵入援未至而敵退乃以二萬人守滑遣副使姚古制置河北以援太原師中援中山河間幹離不師還逐之出境黏罕至太原悉破諸縣爲鎖城法固之內外不相通乃詔師中由井陘出師與古犄角進次平定軍乘勝復壽陽榆次留屯真定密院許翰信覘者言粘罕已遁數遣使督戰且責以逗撓師中不得已卽日辦嚴約姚古張灝俱進輜重賞犒之物皆不取從五月抵壽陽之石坑爲金兵所襲五戰三勝回趨榆次古灝失期不至金人謀知道遠兵飢益兵圍之右軍潰前軍亦奔師中獨以麾下死戰發神臂弓自卯至巳射退敵兵士卒憤賞賚不及皆散去所留纔百人身被四槍力疾鬪死師中老成持重時稱名將劉韜言其壯

命卽行奮不顧身雖古忠臣不過請加優贈詔贈少師諡莊愍
姚兕字武之五原人父寶戰死定州兕補右班殿直爲環慶巡
檢與夏人戰一矢斃其酋衆潰因乘之遂破蘭浪敵大舉寇邊
諸砦皆受圍兕時駐荔原堡先羌未至據險張疑兵伺便輒出
有酋臨陣甚武射中其目斬首還一軍驩呼攻益急復手射數
百人裂指流血遣子雄引騎馳掩其後所向必克敵度不可破
乃退攻大順城兕又往救轉鬪三日凡斬級數千卒全二城慶
軍叛以親兵守西關衆不得入而奔兕追及下馬與語皆感泣
羅拜誓無敢復爲亂神宗聞其名召試騎射屢中賜銀槍袍帶
遷爲路都監徙鄜延涇原從攻河州飛矢貫耳戰益力河州旣
得又爲鬼章所圍乃往擊隴宗攻其所必救圍遂解遷皇城使
進路鈐轄從攻交趾有功領雅州刺史又破乞弟領忠州團練

使進副總管遷東上閤門使徙熙河與种誼合兵洮州破六逋
宗城夜斷去浮橋援兵不得度遂擒鬼章真拜通州團練使卒
於邽延總管贈忠州防禦使兕幼失父事母孝凡圖畫器用皆
刻仇讐未報字方學兵法老不廢書尤喜顏真卿翰墨曰吾慕
其人耳弟麟字君瑞亦有威名關中號二姚與兕攻河州矢
透骨鏃留不去以強弩出之笑語自若積功至皇城使爲秦鳳
副總管從李憲討生羌擒冷雞朴轉東上閤門使領英州刺史
涇原副總管從劉昌祚戰勝磨齊隘轉戰向鳴沙趨靈州以高
一裕敗降爲皇城使永興路鈐轄復爲涇原副總管夏人修貢
乙蘭會壤土麟言夏人順命且可因以息兵獨辭會不可與
戒將帥飭邊備示進討之形以絕其望從之督諸將討堪哥
平經略盧秉上其功賜金帛六百元祐初擢威州團練使龍神

衛四廂都指揮使紹聖三年以建武軍節度觀察留後出知渭
州安燾請留哲宗拜武康軍節度使殿前副都指揮使王瞻取
青唐麟獨謂朝廷方息肩奈何復生大患已而果敗徽宗立進
都指揮使歷建雄定武二軍節度使檢校司徒卒帝臨奠贈開
府儀同三司其爲將沈毅持重不少縱舍宿衛士嘗犯法詔釋
之麟杖而後請拒詔之罪故所至肅然雄字毅夫少爲鷲有
謀年十八卽佐父討金湯以百騎先登奪隘又成荔原之功韓
絳薦其材閤試延和殿安南瀘川之役皆在軍行歷涇原秦鳳
將駐甘谷城知通遠鎮戎軍岷州累遷驍驍使紹聖中部熙河
兵援渭帥章棗城平夏夏人傾國來爭雄出與鬪流矢注肩敵
引卻追攝大破之斬首三千級俘獲數萬城成擗東上閣門使
領泰州刺史明年羌攻平夏勢銳甚城幾不守復與弟古合兵

卻之徙知會州充熙河鈐轄王贍略地青唐羌人攻湟鄯詔與
苗履援之邈川方急雄適至羌望見驚潰圍既解遂趨鄯州履
後期方至贍令席勝平蘭溪宗遣寇履卽往雄諫不聽戒所部
嚴備以待俄而師退賊追及雄整衆迎擊破之獻馘二千哲宗
遣中使持詔勞問徙河州王贍軍陷敵中雄自鄯至湟四戰皆
捷救出之遂築安鄉關夾河立堡以護浮梁通湟水漕運商旅
負販入湟者始絡驛於道加復州防禦使建中靖國初議棄湟
州詔訪利害言其可棄遂以賜趙懷德徙知熙州進華州觀察
使蔡京治棄地罪停官光州居住後復竄金州高永年死西寧
諸戍阻絕起雄權經略熙河安輯新邊改知滄州加俸日天武
四廂都指揮使復知熙州遷安德軍節度觀察留後步軍副指
揮武康軍節度使召詣闕爲中太一宮使引疾納節鉞改左金

吾衛上將軍又轉武康節三知熙州以檢校司空奉寧軍節度使致仕卒贈開府儀同三司諡武憲古亦以邊功累熙河經略靖康元年與子平仲及种氏兄弟折彥質折可求俱勸兵勤王欽宗拜平仲都統制兩家子弟各不相下忌獨歸功种氏陽言士不得速戰各懷忿怒陰謀夜劫幹離不營謀泄反爲所敗旣而議和金兵退詔古與師中彥質范瓊等領兵十餘萬虢送之粘罕陷隆德府復拜古河東制置進兵復之及控威勝軍扼南北關與金戰互有勝負太原圍不解詔與師中掎角師中約古及張灝兩軍齊進而二人失期不至金進兵盤陀古兵潰退保隆德詔以解潛代之時統制焦安節妄傳粘沒喝至勸古遁去軍情搖動兩郡衆皆驚潰李綱召安節斬于瓊林苑陳過庭劾古罪貶爲節副安置廣州後卒

劉舜卿字希元，開封人。父鈞，監鎮戎兵馬。慶曆中，與兄堯卿戰死於好水川。舜卿年十歲，錄爲供奉官，歷昌州駐泊都監。諭降瀘水蠻八百，誅其桀驁，擢知水洛城。近臣薦其能，神宗召問狀。對曰：「自元昊稱臣，秦中不復戒嚴，今宜先自治。」帝善之，命訓京東兵將一年，入閤於內殿。帝嘆曰：「坐作有度，兵可用也。」爾無忘世讐，勉思忠孝，務期盡敵。」舜卿泣謝。卽日加通事舍人，環慶有警，詔帥長安兵赴之。乃單騎馳往，至則難已解，移知原州。改秦鳳鈐轄，襲擊西市城，先登有功。遷皇城副使。久之，知代州。加客省副使，遼遣諜盜西關，鎖舜卿密易舊鑄而大之，數日遼人來歸。鎖舜卿曰：「吾未嘗亡鎖，引視納之，鑄不能受，慚而去。」遂誅謀者，轉西上閤門使，知雄州。始視事，諜告契丹游騎大集，請卽以俟。舜卿不爲動，已果妄，毋契丹繫州民，輒捕其一以相當，必得。

釋乃遣在郡六年恩信周浹元祐初進龍神衛四廂都指揮使
領高州刺史知熙州夏人聚兵天都連西羌鬼章壽宜結將大
舉入寇舜卿欲乘其未集擊之會諸將議方略使姚兪部洮西
合熟羌擣講珠城种誼部洮東由哥龍谷宵濟黎明至臨洮城
東一鼓克之俘鬼章并首領九人斬馘數千還馬軍都處候再
遷徐州觀察使步軍副都指揮使知渭水名還宿衛卒贈奉國
軍節度使諡曰毅敏爲人知書曉吏事諳文法善料敵著名北
州

間曰紛紛行伍時豈無材哀然特山青也爲鬼种姚世將
有瓊有瑰得失成敗相乘互開北朝背盡再啓南垓

弘簡錄卷一百十九終

弘簡錄卷一百二十

明刑部員外郎仁和弘濟邵經邦學

皇清翰林院侍講學士四世孫遠平校閱

功臣 宋三之七

張俊

子蓋
曾孫潘

韓世忠

子彥直

劉光世

父延慶

王淵

張宗顏

趙密

解元

成閔

王德

張俊字伯英鳳翔成紀人幼英偉善騎射起於羣盜年十六爲
三陽弓箭手政和七年從討南蠻宣和初從攻夏人授承信郎
平郿賊李太及河朔山東武朔寇進武德郎靖康初守東平轉
武功大夫金人攻太原從种師中爲隊將進擊殺傷甚衆獲馬
千匹俊請乘勝要戰不聽金人乘之師中戰死俊率所部突圍
而出且行且戰至烏河川再與敵遇斬首五百勒兵與田師中

楊沂中同從信德守臣梁楊祖勤王高宗開府留爲後軍統制
領榮州刺史從至東平殲李昱之衆進桂州團練使就加防禦
使有蠟詔徵高宗還京俊首決大計曰大王居外此殆天授豈
可徇金人詐謀輕蹈不測因請進兵如濟州有欲俟乾龍節謁
香劫王以叛者俊曰元帥不出則姦謀自破矣賊計窮黎明遁
去俊引兵追殺之轉徐州觀察使遷拱衛大夫未幾汴京破人
心惶惶王進退猶豫俊懇辭勸進曰大王皇帝親弟人心所歸
若不早正大位無以係天下之望王深然之遂令扈從發濟州
至應天卽位初置御營司就改前軍統制遣迎隆祐太后權素
鳳兵馬鈐轄尋奉后與六官以歸除帶御器械命討羣盜淮寧
杜用鎮江趙萬郭青杭州陳通蘭溪蔣和尙皆平之除正任觀
察使建炎二年升秦鳳路馬步軍副總管尋破秀州徐明斬獲

萬計進武寧軍。承宣使時議恢復。俊奏：「今敵勢方張。安且南據江爲險。練兵政安人心。俟國勢稍定。大舉未晚。」旣而敵寇至。亟奏飭甲乘從幸臨安。留俊屯吳江。苗劉反。矯除捧日。天武四廂都指揮使令以麾下三百赴秦鳳。餘兵他將代領。俊知其僞。拒不受。三軍洶洶。俊諭曰：「當詣張侍郎求決。」卽引所部八千人至平江。見浚大惕。決計起兵問罪。云：「須侍郎濟以機術。毋驚動乘輿。」呂頤浩至。見之亦泣曰：「今日惟一死報國。」因與劉光世釋憾。假韓世忠一軍前行。而已領精兵翼之。戰於臨平。賊敗遁。俊等入城。見於內殿。帝嘉勞久之。拜鎮西軍節度使。御前右軍都統制。兼浙東制置。兀朮深入。渡江。俊自越州引兵從帝如明州。及攻臨安。帝如溫州。留俊於明州拒敵。賜御札曰：「朕非卿誰先倡義。卿捨朕俱廢。前功空戮力扞敵。一戰成功。當封王爵。金兵

以除夕至城下使劉寶與戰小却黨用丘橫死之俊與守臣劉
洪道率州兵奮力破賊殺千人戒將士毋驕情敵必再至下令
清野以輕舟伏弩閉關自守次日正旦忽西風起敵果乘勢來
攻俊與洪道坐城樓上遣兵掩擊金人奔北死於江者無數夜
拔砦去屯餘姚後七日又至俊引兵趨台州居民去者十七八
未幾羣盜蠭起授兩浙西路江南東路制置使命領所部招收
羣盜梟以後軍統制陳思恭謀之令兩浙宣撫周望以兵屬俊
會改御前五軍爲神武軍卽拜神武右軍都統制檢校少保定
江昭慶兩軍節度使浙西寇平改江淮以南招討使請討巨盜
孔彥舟張用李成時成圍江州其黨馬進在筠州豫章介江筠
之間俊聞命亟趨入豫章喜曰我已得洪州破賊必矣斂兵城
中息金鼓禁人輒登城賊以爲怯居月餘遣人索戰大書來牒

俊細書狀報之尋諜知賊息徑由上流絕生米渡出賊不意追奔七十里至筠州賊背河而陣已率步兵當其前以精騎投沂中及思恭約於午時從山後夾擊鏖戰及期精騎自山馳下賊駭亂退走遂復筠州追至奉新北樓子莊成黨商元據草山挾險設伏俊遣步兵從間道直趨山椒殺伏奪險乘勝追至江州賊勢危迫絕江而遁呼爲張鐵山江州已復而興國軍等處羣盜聞風亦遁遂引兵渡江至黃梅賊懲前敗率衆數萬據石幢坡憑山投以木石俊親冒矢石盡力攻險衆遂大潰追兵殺馬進成北走降劉豫京西賊李忠與譚兗各率衆歸俊俊命王庶分領其兵諸郡悉平紹興元年加授太尉移屯婺州諜報金與劉豫分道入侵舉朝震恐請他幸俊謂趙鼎曰避將何之惟有向前一步耳改俊兩浙西路江南東路宣撫使屯建康旣而兼

淮西潁江相拒逾月敵不得入俊遣張宗顏潛至六合出其背敵引去又遣王進速往乘敵渡淮未濟擊之果獲酋帥程師回張延壽以獻五年與存中合兵拒劉麟於泗州六年改崇信奉寧兩軍節度使麟兵十萬犯濠壽俊分遣存中與宗顏王瑋師中等自定遠次越家坊遇劉覲兵擊走之而身率大軍至魏家灣與覲大兵會戰殺獲畧盡降者萬餘覲僅以身免真拜少保加節鎮洮帝面諭卿議論特重深達敵情兼聞挽強之士數萬報國如此朕復何慮又曰羣臣謂朕待卿獨厚其仰體眷懷益思勉勵七年改淮南西路安撫使置司盱眙與世忠入見秦檜諭以上旨言倚二大將譬如兩虎張左右手豈可一手不盡力耶八年寢兵賜號安民靖難功臣加少傅九年金復渝盟再破河南圖順昌命俊策應劉錡督軍渡江金人引退繼而分三路

自東西京抵亳州北渡河俊收宿亳諸軍擊之盡復衛其廬邑
等地十年王德下符離乘勝趨亳金人棄城遁父老列香花迎
入遂復亳州留統制宋超守之軍還壽春進少師封濟國公十
一年兀朮入合肥漸攻歷陽制置葉夢得請速出軍俊遣兵渡
江諭諸將曰先得和州者勝王德率諸軍鼓譟而前俊督兵繼
之宿於江中後三日大敗金將韓常於含山命關師古復巢縣
併復昭關使趙密假兵篁竹山六丈河以分敵勢授張守忠五
百騎敗金人於全椒未幾敵斷梁以拒俊引衆涉流登岸追擊
敗敵於柘臯拜樞密使俊知朝廷堅欲罷兵迎合檜意力贊其
和首請納所統兵議宿亳功部將王德用師中劉寶李橫馬立
張澥同日咸受上賞自此言無不從所薦多至監司郡守劉子
羽起廢亦倚俊力十一年加大傅封廣國公復命如鎮江措置

軍務。蜀進益國公。作如德。其以盡罷計。將獨假以兵權。歲餘。知
俊無去意。使御史江邈論罷之。以鎮洮寧武。奉寧三軍節度。充
醴泉觀使。加封清河郡王。奉朝請。勅修甲第。遣中使就第賜宴。
侑以教坊樂。部十六年。又改靜江寧武靜海三軍。二十一年。車
駕幸其第。就拜太師。遷子弟十三人秩。帝雖眷之特厚。警敕亦
不絕口。自淮西入。見教以讀子儀傳。名入禁中。戒毋與民爭利。
毋興土木。二十四年七月薨。年六十九。三免朝。斂用一品服。臨
奠。慟哭。追封循王。俊握兵最早。屢立戰功。惟岳飛冤獄。俊獨贊
成。論者惡之。子五人。子琦。子厚。子顏。子正。子仁。姪子蓋。字德
高。父宏從俊破開德。戰死。子蓋從討苗。傳補承信郎。遷武功郎。
擊剋倪。授閤門宣贊舍人。改昌州刺史。江南東路馬步軍都總
管。復宿亳。遷登州防禦使。兼宣撫司衙兵副統制。柘臯之役。

興寧永寧承宣使和議成改建康府駐劄御前諸軍都統制龍
神衛四廂都指揮使兩浙西路馬步軍都總管帝幸俊第授子
蓋安德軍節度使三十二年春金人攻海州急命爲鎮江都統
率兵往援卽日渡江馳至楚州亟趨漣水取便道以進次石湫
堰金陳萬騎於河東子蓋率精銳數千擊之語麾下曰彼衆我
寡利在速戰命各奮力大呼入陣諸將繼進賊大敗擁溺石湫
河死者大半圍遂解金復整軍來戰再率精銳進擊復車馬鎧
仗萬計退屯泗州孝宗召對賜鞍馬鎧甲束帶令招集勇敢相
時而勦還招金大將蕭鵬也耶律造哩將其衆來降授檢校少
保淮東招撫使未上卒年五十一贈太尉諡恭壯曾孫濡德
祐元年將兵守獨松關元遣禮部尙書廉希賢工部侍郎張忠
範奉國書至濡部曲殺忠範執希賢送臨安希賢病劓死朝廷

使人移書元軍言殺死之事乃邊將爲之太后嗣君皆不知當按誅之元兵破獨松濡遁後爲希賢子所殺

冊曰開府握兵旣親且久同時勸進厥功居右陷飛於寇隙錡於壽存中腹心劫之亦走反覆求全斯爲可醜

韓世忠字良臣陝西延安人曾祖則居鄉以義俠聞祖廣父度家世饒財世忠風骨偉岸目瞬如電早年驚勇絕人能騎生馬旬嗜酒尙氣不可繩檢日者言異日當作三公年十八應鄉州募隸赤籍挽強馳射冠絕三軍崇寧間從黨萬捍禦西夏至銀州斬關殺將擲首陴外諸軍乘之夏人大敗旣而夏以重兵次平嶺復率精銳鏖戰解去俄復出間道獨部勇敢士與敵死關遇監軍駙馬兀朮躍馬斬之敵衆大潰經畧上其功童貫疑有增飾止補一資從劉延慶築天降山砦爲敵所據世忠夜登

城斬二級。割護城甃以獻。繼遇敵佛口砦。又斬數級。補進義副尉。至賊底河。斬三級。轉進勇副尉。討方臘。爲王淵偏將。師次杭州。賊奄至。勢甚張。淵惶怖無策。世忠潛於北關。伏兵二千。賊過。伏發。掩擊。賊敗而遁。淵歎曰。此真萬人敵也。盡賞以所隨白金。器且與定。交時。詔得臘首者。授節鉞。乃窮追至睦州清溪峒。賊據巖窟深阻。莫知所入。世忠獨潛行溪谷間。問野婦得小徑。挺身仗戈直前。渡險數里。方至。格殺數十人。擣其巢。擒臘以出。幸興宗截峒口。掠爲己功。故賞不及。別帥楊惟忠還闕。直其事。轉承節郎。議復燕山。劉延慶與騎五十偕蘇格等抵渚。汴河達金兵二千餘。格失措。世忠從容令列高岡。戒勿動。值燕卒潰。舟橫河岸。約鼓譟。助已聲。勢親躍馬薄之。旋轉如飛。敵二隊據高阜。出其不意。突上。奮擊。格等夾攻。敵大亂。追斬甚衆。旋又從梁方

平討山東河北盜賊積功轉武節郎靖康初從屯濟州金兵壓境方平不戒潰師數萬世忠陷重圍揮戈力戰突圍出焚橋而還欽宗召對詢方平失律狀條奏甚悉轉武節大夫時勝捷軍敗宣撫李彌大斬其帥張師正軍校李復作亂山東復授彌大檄世忠將所部追擊至臨淄兵不滿千分爲四隊令曰進則生退則死走者命後隊勦殺衆皆奮勇莫敢返顧大破之乘勝追至宿遷夜單騎造其營曰大軍且至亟束戈卷甲吾能保全汝共功名賊駭慄就降遷左武大夫正任軍州團練使屯滹沱河時真定失守糧盡援絕知王淵守趙亟往赴之會大雪乘夜鎖死士三百擣金營敵驚亂自相擊刺渠帥被剄死迄旦盡遁遷嘉州防禦使還大名趙野辟爲前軍統制康王如濟州領所部勸進金兵逼城人心恟惧世忠據西王臺力戰金師少却翌日

數萬衆復至世忠麾下僅千人單騎突入斬其酋衆皆潰去高
宗卽位領光州觀察使帶御器械初建御營授左軍統制命討
單州魚臺賊又擊黎驛叛兵喬仲福皆斬以獻入備宿衛建炎
二年升定國軍承宣使扈蹕如揚州張遇衆數萬屯金山來降
抵城下不解甲人心危懼請獨造其壘曉以逆順衆悉聽命卒
民衆十萬亦降比至有反覆狀王淵遣世忠諭旨知其黨劉彥
異議至卽先斬彥糾小校二十九人送淵斬之事定除京西等
路捉殺盜賊金再攻河南合羅進兵夜襲悟室營不克時丁進
失期陳思恭先遁世宗被矢如棘力戰得免還汴斬先退者以
徇進由是有隙尋以叛誅召世忠還授鄜延路副總管加平寇
將軍屯淮陽粘罕自將大軍迎戰以力不敵引歸敵蹕之潰於
沐陽閤門張遇死之三年帝召諸將議移蹕世忠言淮浙富饒

詎可舍而之他。惟當留兵守江淮。分兵衛車駕耳。帝決意如錢塘。乃收合散亡得數千人。由海道赴行在。張浚以書白苗劉反狀。得之大慟。舉酒酹地。誓不與賊共生。三月戊戌。以所部發平江。張俊慮其兵少。借以劉寶舟師二千。綿亘三十里。至秀州。稱病不行。密造攻具。治器械餉等。質其妻子。矯制除定國軍節度使。屯江陰。世忠以好語報之。朱勝非以計脫其妻子。給傳曰。今白太后遣往慰撫。世忠則平江諸將益安矣。傅等從之。召梁氏入封安國夫人。俾迓世忠。梁疾驅出城。一日夜抵秀。適明受詔至。世忠取焚之。斬其使。曰。吾知有建炎。不知有明受。進次臨平。賊將植鹿角。梗舟。乃舍舟馬戰。少却。復舍馬步戰。挺刃突前。令將士曰。今日當以死報國。面不被數矢者。皆斬。士皆用命。賊衆辟易。大敗遁去。世忠馳入覲。帝步至宮門。握手勸曰。中軍吳湛。

佐逆爲最尙留朕肘腋盡先誅之卽謁湛握手與語折其中指戮於市詔授武勝軍節度使御營左軍都統制時賊雖遁尙擁精兵世忠言旣闔距此不遠儻成巢窟卒未可滅請亟往討授江浙制置使陛辭帝手書忠勇二字揭旗以賜世忠曰臣誓生擒此賊爲社稷刷恥乞賜殿前二虎賁護俘來獻乃自衢信追至漁梁驛遇賊徒步挺戈而前賊衆望見咋曰此韓將軍也遂驚潰卽擒正彥傳走建陽追擒之皆送行在伏誅授檢校少保武寧昭慶兩軍節度使兀朮將入侵復召諸將問移蹕世忠言國家已失河北山東若又棄江淮更有何地乃命兼浙西制置使守鎮江旣而兀朮分道渡江諸屯皆敗世忠亦退保江陰敵旣得建康山廣德破臨安世忠謀截金人歸師以前軍駐青龍鎮中軍駐江灣後軍駐海口時帝已如浙東詔赴行在奏言臣

留江上。願盡死一戰。以遏其歸。帝以頤浩在會稽。謀建此策。適與世忠合。賜親札聽留。金兵至。則世忠已先屯焦山寺。受金將李選降。兀朮約日大戰。梁夫人親執桴鼓。至數十合金兵。終不得渡。請盡歸所掠假道。不許。請獻名馬。又不許。撻辣在濰州遣李董太一來援。相持黃天蕩四十八日。李董軍江北。兀朮軍江南。世忠以海艦進泊金山。授健卒以鐵綆貫大鈎。敵舟謀而前。海舟分兩道出其背。每綆一綆。則曳一舟沈之。兀朮窮蹙。求會語。祈請甚哀。世忠曰。還我兩宮。復我疆土。庶可相全。兀朮語塞。又數日求再會。言不遜。引弓欲射之。亟馳去。謂諸將曰。南軍使船如使馬。奈何。因募破海舟策。有閩人教以舟中載土上鋪平。版穴船板。以權槳風息。則出有風。則止。海舟無風不可動也。又謀鑿大渠接江口。則在世忠上流。潛於半夜鑿渠三十里。刑白。

馬剔婦人心自割其額以祭天次日風止我軍帆弱不能運金人乘小舟縱火矢下如雨孫世詢駭允皆戰死敵得絕江遁去先是世忠料敵至必登金山廟觀我虛實預遣百兵伏廟中百兵伏岸側約聞鼓聲內外合擊果有五騎闖入伏發僅得二人逸其三中有絳袍玉帶墜馬復馳者詰之乃兀術也時世忠兵僅八千餘拒金人十萬帝凡六賜札褒獎拜檢校少保換節武成感德兩軍爲神武左軍都統制會辛企宗討捕建寇范汝爲不克以世忠兼福建宣撫副使亟領兵三萬由間道進次劔潭賊焚橋世忠策馬先渡遂濟師命諸軍偃旗息鼓密趣小徑抵鳳凰山俯瞰城邑設雲梯火樓日夜併攻賊大震怖五日城破汝爲竄身自焚斬其弟岳吉禽謀主謝嚮施達及裨將陸必彊等五百餘人初世忠欲盡誅州民李綱自福州來言建民多無

率乃下令軍士駐城上聽民自別獨取附賊者誅之汰遣脅從
仍給牛穀弛商賈征禁民感更生家爲立祠捷聞帝曰雖古名
將何以加賜黃金器皿因奏江西湖南寇尚多請乘勝討平之
時曹成方擁衆彬邵世忠旋師永嘉若將休息者忽由處信徑
至豫章連營數十里賊不虞其至大驚遣人招降之得戰士八
萬遣詣行在遂移師長沙時劉忠據白面山營柵相望世忠至
堅壁不動衆莫測一夕與蘇格聯騎穿賊營候者呵問先已得
賊軍號隨聲應之周覽以出喜曰此天賜也夜伏精兵二千於
山背指授方略比曉與諸將拔營進賊方迎戰所遣兵遽馳入
中軍奪其望樓植我旗蓋傳呼聲如雷賊回顧驚潰內外夾擊
大破之忠奔劉豫湖南遂平加授太尉賜以帶笏勅樞密以功
頒示中外師還選所獲勇鷲者置背嵬軍時帥臣皆罷宣撫獨

不去之命領江南東西路置司建康進開府儀同三司兼淮南
東西路宣撫使置司泗州金與劉豫分道入侵手札命飭兵備
圖謀進取辭旨懇切受詔感泣曰主憂如此臣子何以生爲遂
由鎮江濟師使統制解元守高郵親提騎兵駐大義伐木爲柵
自斷歸路會遣魏良臣使金世忠撤炊爨給良臣曰有詔移屯
守江良臣疾馳去世忠度良臣已出境卽上馬令軍中曰朕吾
鞭所向於是引軍次大儀勒五陣設伏二十餘所約聞鼓起擊
良臣至金軍具以所見告聶兒孛董問世忠退喜甚引兵至江
口距大儀五里別將撻索也擁鉄騎過五陣東世忠傳小麾鳴
鼓伏兵四起旗色與金人旗雜出金軍亂我軍迭進背鬼軍各
持長斧上掛人首下斫馬足敵被甲陷泥淖世忠麾勁驍四面
蹂躪人馬俱斃遂擒撻孛等二百餘人所遺董咬亦擊金人

於天長孫之鵠口擒女真四十餘人解元至高郵遇敵設水軍
夾河陣日合戰十三相拒未決世忠遣成閔將騎士往援復大
戰俘生女真及千戶等世忠復親追至淮金人驚潰相蹈藉溺
死甚衆捷聞羣臣入賀帝曰世忠忠勇朕知其必能成功沈與
求曰自建炎以來將士未嘗與金人一戰今世忠屢挫其鋒厥
功不細帝命速加優賞於是部將董咬陳桷呼延通解元等皆
峻擢有差論者以此戰爲中興武功第一真拜少保武寧安化
兩軍節度使京淮東路宣撫處置使置司楚州始至披草萊立
軍府與士卒同力役夫人親織薄爲屋將士怯戰者遺以巾幘
故人人奮厲撫集流散通商惠工山陽遂爲重鎮間遣結山東
豪傑約以援急爲應宿州馬秦及太行羣盜願奉約束時劉豫
方聚兵淮陽世忠奉張浚令引軍渡淮攻宿遷竝符離而北至

城下爲賊所圍奮戈潰圍出不遺一鏃呼延通與牙合孛董搏戰扼其吭而禽之乘銳掩擊旣而圍淮陽堅守不下初金人約以受圍一日則舉一烽至是六烽俱舉兀朮與猗皆至世忠求援張俊俊不從乃勒陣向敵遣人語曰錦衣驄馬立陣前者韓相公也或危之對曰不如是不足以致敵敵果至殺其導戰二人遂引去尋詔班師淮陽民從而歸者以萬數論功賜號揚武翊運功臣再加橫海公領三鎮節度使六年九月朝帝平江會邊報急引兵渡淮與金將訛里也力戰劉猗將寇淮東爲所扼不得進七年築高郵城民益安之會檜主和議命棄山陽移屯鎮江世忠奏金人詭詐恐以計緩我師乞留此軍遮蔽江淮願効死節率先赴敵倘若不勝從之未晚又言王倫藍公佐交割河南地界乞令明具無反覆文狀以爲後證章凡十數上皆懌

慨激切帝率優詔褒荅然不能用後金果背約咸如其言金使來以詔諭江南爲名又四疏力言不可願舉兵決戰最重處臣請獨當且欲單騎詣闕而奏不許旣而伏兵洪澤鎮將殺金使不克九年加授少師十年金人敗盟分道入寇八月世忠進圍淮陽金及酈瓊合兵來救迎擊於泃口鎮敗之又遣解元擊於渾城劉寶擊於千秋湖皆捷親從將成閔許世安奪淮陽門而入大戰門內世安中四矢閔被三十餘創復奪門出奏其功擢武德大夫由是知名世忠進太保封英國公兼河北諸路招討使兀朮願昌之敗謀再入詔大合兵於淮西以待世忠受詔救濠以舟師至招信縣夜率騎兵敗金人於間賢驛旣至濠州已破復與金戰淮岸將遣劉寶汧流劫之金人伐木塞赤龍州扼其歸路乃全師而還金亦自渦口渡淮北去自是不復入侵

矣。凡鎮楚十餘年。兵僅三萬。而敵人不敢犯。檜收三大將權。拜樞密使。嘆曰。人情消弱。國勢委靡。誰復振之。賊臣誤國。一至於此。檜諷言者論劾。帝格不下。還。連疏乞解兵柄。罷爲醴泉觀使。奉朝請。初。封福國公。十二年。改潭國公。顯仁后還。迎謁。檜平入朝。后以在北。問名慰問。良久。十三年。進封咸安郡王。十七年。改鎮南武安寧國節度使。二十一年。八月。薨。年六十三。贈太師。追封通義郡王。賜朝服。貂蟬冠。水銀龍腦以歛。孝宗又進。斯王諡忠武。配饗高宗廟。庭世忠性愷直。忠義勇敢。出於天賦。事關社稷。必流涕極論。岳飛冤死。舉朝無敢出一語。世忠獨擐檜怒語。在飛傳。又詆排和議。屢觸檜不恤也。素輕財。錫賚皆分將士。賜田輸租。與編戶等。持軍嚴。重。甘苦必同。器仗規畫。精絕過人。今克敵弓。連鎖甲。後覘慈。及跳淵習騎。洞貫習射等法。皆其所遺。

臂中毒矢入骨。以彊弩括取之。十指僅全。四不能屈。伸刀痕箭
瘢如刻畫然。解柄家居。又十年。口不言兵。時跨驢携酒縱遊西
湖。以自樂。部曲成閔。解元王勝王權劉寶岳超皆秉節旄。晚喜
釋老。自號清涼居士。子四皆以材名。長彥直字子溫。期歲蔭
補承奉郎直祕閣。六歲人見命作大字。即跪書皇帝萬歲四字。
帝喜之。相其背曰。他日令器也。孝宗時。升角侍側。帝親解其繻。
傅于首。賜金器筆硯監書鞍馬。十二賜三品服。登進士。謫太社。
令父憂服除。檜因舊恨出爲浙東安撫司主管機宜文字。檜死。
拜光祿丞。遷屯田員外郎兼樞右曹郎官。張浚檄權計議軍事。
乾道二年。遷戶部郎官。主管左曹總領淮東軍馬錢糧。初給米。
不如數。稍錢僅二十萬。明年奏計。乃四倍。因獻其贏于朝。帝嘉
拜司農少卿。進直龍圖閣。江西轉運權知江州岳飛宋貲產多。

在九江彥直奉詔盡搜剔還之時相復不樂密啓換武階授利
州觀察使知襄陽充京西南路安撫使轉鄂州駐劄御前諸軍
都統制條奏軍中六事備器械增戰馬革濫賞厲奇功避勇略
充親隨議多從之先是騎兵多不能步戰彥直自領騎士被甲
徒行日六十里分令統制以身帥之人始耐習勞苦馳騁如飛
事聞詔三衙江上諸軍倣行之八年丐歸文班授左中奉大夫
敷文閣待制知台州進對乞復荆襄鄂渚爲一軍京西湖北轉
運爲一司分官置司襄陽事體可一帝善之遷刑部侍郎朝議
大辟三鞠之弗承宜令以衆證就刑著爲令彥直不可白丞相
梁克家曰若是則善類被誣必多議遂格遣使金國蒲察問接
國書事彥直因與論難往復數十旣至幾懼不測者再來嘗加
辱卒禮遣之帝嘉歎遷吏部侍郎權工部尚書兼知臨安以直

龍奉祠尋知隰州捕巨猾王永年杖徙他州奏免民間積逋以
餘財代輸之坐累久內帑坊場錢不發錫一官值海寇披猖彥
直授將領土彙等方略不旬日生禽賊首海道爲清以功進敷
文閣學士入對乞搜訪靖康以來死節之士以勸忠義追貶部
曲誣陷岳飛者以慰忠魂選人已經闕升歷考無贓私罪犯者
雜試以經術法律俾孤寒者得以自達州郡守臣任滿日開具
實在財賦數目達臺省庶可覈實以戢奸弊悉嘉納之淳熙十
年旱應詔以爲濫刑所致進戶部尚書乞廣糴以爲先備時三
衙皆所以拱扈宸居而司馬乃遠在數百里外乞令歸司上亟
稱其有才力尋以疾辭除提舉萬壽觀賜藥餌進顯謨閣學士
嘗撫宋事分爲類目百六十七卷名木心鏡尤褒脩史白於衛
取是書以進光宗覽之稱善進龍圖閣學士轉光祿大夫致仕

卒贈開府儀同三司爵蘄春郡公次彥朴奉議郎彥質朝奉大夫直徽猷閣爲兩浙運判司祠奉親差提舉佑神觀特令佩魚以示異數彥古敷文閣待制知平江

冊曰明受反正首建奇功金山扼險遏廻窮凶維汴有此曷遠傾圯大儀之捷南渡無比義不主和銚銚可喜終始完名斯人而已

劉光世字平叔保安軍人父延慶有勇略數從西伐立功積官相州觀察使龍神衛都指揮使鄜延路總管破夏人降其王子拜保信軍節度使平方臘授宣撫都統制北伐燕山督兵十萬渡白溝河軍行營不設備郭藥師諫不聽至良鄉爲遼將蕭幹所敗時光世在軍中號三將軍藥師因說延慶曰幹所領兵舊人燕山必虛願得奇兵五千倍道襲取令三將軍後繼破之必

矣延慶許之方入燕城幹還兵巷戰延慶渝約不遣光世往藥
師失援敗走延慶營盧溝南幹分兵斷餉道擒漢軍二人使歸
報敵兵三萬來殲適明旦見火起以爲果至燒營而奔自相蹂
踐凡熙豐以來所儲軍實亡殆盡退保雄州朝議貶幸府副
幸安置筠州靖康初起爲鎮海軍節度使命守京城城陷奪門
出爲追騎所殺光世蔭補三班奉職累遷邢延路兵馬都監領
蘄州防禦使方臘亂自將一軍趨衢婺討之進耀州觀察使爲
兵馬鈐轄燕山之役以取易州降藥師功除威武奉寧軍承宣
使坐前敗降三官河北賊張廸掠涪州光世度其烏合非有紀
律佯北以邀之果大潰復承宣使充馬步軍都總管夏人寇杏
子堡中有兩山對峙地險阨得先據之敵敗去擢侍衛馬軍都
虞候金再攻汴范致虛檄召諸路入援光世引兵會之俄聞京

城失守別道趨濟州謁康王命爲五軍都提舉高宗卽位命省
視陵寢尋兼提舉御營司一行事務爲行在都巡檢使斬山東
賊李昱遷奉國軍節度使平鎮江叛兵改滁濠太平無爲江寧
制置使討張遇池州陣不整幾爲遇執王德救之免復整兵追
至江州斷其後軍破之又追擊於江寧加檢校少保討李成先
鋒王德敗賊於上蔡驛口橋光世便服臨師成遙見白袍青蓋
併兵圍之德復潰圍出土爭奮再戰皆捷成遁執其謀主陶子
思加檢校少傅帝在揚州倉卒渡江命爲五軍制置屯鎮江控
扼江口加檢校太保殿前都指揮使苗劉素憚光世矯遷淮南
制置使張浚馳書諭以勤王光世難之頓泣再遣使至始引兵
會於丹陽以選卒爲游擊分戢于後併力破賊至行在遷太尉
御營副使浚令撫定逆將范瑗之衆又招降賊斬賽除江東宣

撫使命守太平池州受杜充節制光世不從言其不可者有六
帝怒詔母入殿門光世始受命隆祐太后在南昌命移屯江州
爲屏蔽既至日置酒高會金人由黃州渡江三日無知之者太
后退保虔州光世遁自信州引兵至南康鄺瓊圍固始縣遣人
招降之時光世部曲無所隸號太尉兵御史沈與求論其非宜
會御營司廢乃以巡衛名其軍充御前巡衛軍都統制召赴行
在授浙西安撫大使知鎮江府光世不肯行諫議黎確論劾釋
不問加寧武軍節度使開府儀同三司遣之金兵留淮東光世
頗畏其鋒帝手札趣赴楚州不行但遣王德鄺瓊將輕兵以出
時奏殺獲而已楚州破命節制諸鎮力守通泰完顏昌屯承楚
光世諜知其衆思歸欲攜貳之鑄金銀爲錢文曰招納信寶間
使持示其徒有欲歸者扣江執以爲信歸者不絕因剗奇兵赤

心。而軍呂拔砦去。紹熙元年。金人渡淮。要地皆闕。守命兼淮南。京東宣撫。置司揚州。迄不行。張俊討李成。命分兵往舒。浙。擣其巢。又不行。連水軍郭仲威。謀據淮南通。劉豫。光世遣王德擒之。併其衆。范宗尹言。光世軍多冗費。願汰之。帝不欲治。但作手書戒諭如家人禮。有枯槁生。應奏以爲瑞。却之。淮北人多歸附者。命兼海泗宣撫。安輯其衆。五湖漁人夏寧聚衆掠人爲食。仲威餘黨出沒淮南。水軍統制邵青據通州叛。圍太平。皆招降之。光世請別鑄宣撫使印。增設將吏。給鎮江常州江陰苗米三十七萬斛爲軍中歲費。皆從其請。二年。復命移屯揚州。時至鎮江視師。不奉詔。言鄰寇有疑。或致生事。願仍領浙西爲根本。計司諫方孟卿劾之。乞召宰執與議。使之必往。光世猶以乏糧爲辭。呂頤浩將出視師。首言。光世兵冗不訓練。乞移就闕。帝以光世軍

糧不足驟移必潰當先犒而後料簡可也願浩又奏光世月費
二十萬緡乞差官考覈詔御史江躋度支胡蒙至軍黥校終不
得實帝方倚其成功尋詔兩漕臣措置鎮江酒稅務及罷織御
服羅省七百萬緡以助之光世奏部將喬仲福斬賽防江有勞
詔各進一官許回授光世固乞轉行給事程瑀持不可三年命
與世忠易鎮授檢校太傅江東淮西宣撫使置司池州世忠既
至鎮江城下有奸人焚府庫光世擒之云世忠所遣嫌毀益起
世忠屯登雲門光世引兵出懼其扼已改途趨白鷺店世忠遣
兵襲其後事聞帝遣使和解賜錢十萬緡劉豫引金入寇帝以
光世與俊世忠三大將權相埒且持私隙遣御史魏玪至軍中
諭以滅怨報國光世始移軍太平以援世忠兵退入覲遷少保
請以所置淮東田易淮西田給事晏敦復言擾民而止又請並

封三妾爲孺人大將封妾自此始時改神武爲行營護軍復以所部稱左護軍劉豫築龍城以窺淮西光世遣王師晟鄧瓊襲破之擒僞統制華知剛加保靜軍節度使領三鎮金人分道入浚命屯廬州與世忠俊鼎立沂中將精卒爲後距值劉猗驅鄉民僞爲金兵布淮境光世密于趙鼎奏廬難守欲還太平退保采石浚命呂祉馳往督師號令其衆若有一人渡江卽斬以徇光世不得已駐兵與沂中相應遣德瓊領兵自安豐出與金將崔臯賈澤王遇三戰皆敗之浚奏光世驕惰不力不可爲大將鼎謂其累世爲帥將卒多出其門一旦罷之恐拂人心司諫陳公輔論劾乃引疾罷獻所餘金穀于朝轉少師充萬壽觀使奉朝請始封榮國公賜建康甲第一區以兵歸都督府麾下多降盜素無紀律鄧瓊遂殺呂祉驅諸軍降劉豫和議成賜號和衆

輔國功臣進封雍國公。命宣撫陝西。弟光遠疏其短。勾龍如淵再論。光世不可遣而止。金人圍順昌。加太保。除三京招撫處置使。以援劉錡。請李顯忠爲前軍都統。又請王德自隸。德不願受其節制。進至和州。召還。改封楊國公。十二年薨。年五十四。帝臨奠。贈太師。諡武僖。官其子孫甥姪十四人。其在諸將中最爲先進。然溺酒色。律身不嚴。馭軍無法。不肯爲國任事。聞語恢復。意氣拂然。玩寇自恣。見詆公論。初結內侍康履自固。晚歲先解兵柄。與時浮沉。不爲奸檜所忌。故能竊寵榮以終其身。方之韓岳。不逮遠矣。

冊曰：建炎之政劣于建武。駕馭無術。此何足數。

王淵字幾道。熙州人。徙環州。善騎射。應募擊夏國。屢有功。遷熙河蘭湟路第三將。權知鞏州。寧遠砦諸羌入寇。經略司表淵總

領岷山蕃兵將城澤州羌悉衆來爭淵奮擊大破之追至邈州
移同總領湟州蕃兵兼知臨宗砦坐法免討方臘爲劉延慶先
鋒賊將據錢塘淵諭部校韓世忠曰我軍遠來賊必易之明日
爾逆戰僞遁我伏强弩數百步外必可得志世忠如其言賊果
來追伏弩猝發應弦而倒遂敗賊平授開門宣贊舍人權京畿
提舉保甲兼權提點刑獄公事繼從延慶攻契丹遣護餉道爲
敵所獲已而逃歸不改任遷武功大夫果州團練使又從辛興
宗破羣盜高托山遷拱衛大夫寧州觀察使靖康元年爲真定
總管就遷都統制吳湛據趙州叛討平之金攻汴京宣撫范訥
統勤王兵屯雍丘以淵爲先鋒尋以所部歸康王府王如濟州
命統三千人入衛宗廟至汴都見邦昌慟哭宣敘高宗初立與
諸將苗傅等皆在行朝不相統一俄除御營司都統制扈從累

月不釋甲帝如揚州授龍神四廂都指揮使尋改捧日天武四廂進保大軍承宣使羣盜蠭起又充制置使提兵四出所向皆捷預平趙萬誅陳通降張遇期年羣盜略盡遷嚮德軍節度使金人攻揚州淵專管江上海船諸將所部多不能濟劉光世見帝泣告淵忿其言斬江北都巡檢皇甫佐自解自是失諸將心帝欲往鎮江以援江北淵言鎮江止可捍一面若金人自通州先據姑蘇將若之何不如錢塘有重江之險議遂決命守姑蘇時自平江赴行在拜簽書樞密院事仍兼都統制命下諸將籍籍以淵驟用頗缺望而內侍康履頗用事淵與之善衆以爲由宦官薦愈不平俟淵入朝統制官苗傅劉正彥伏兵殺之遂成明受之變時年五十三贈開府儀同三司累加少保官其子倚并孫八人諡褒愍其爲將輕財好義家無宿儲每言朝廷官人

祿足以代其耕。若復事錐刀。何異商賈。然平糴盜多殺降。故及於禍。

張宗顏字希賢。延安人。父吉爲涇原將。解宜威城圍死之。宗顏以恩補三班借職。監閤鄉酒稅。積官至涇原副將。權殿前司統轄御營軍。統制張俊選爲統領。從討徐明。轉忠州刺史。遷御前中軍統制。金攻明州。宗顏破其前軍。又命與李捧陳思恭同討松溪盜楊勅。宗顏次浦城。不進。謬言賊以擊退。御史沈與求劾之。貶二秩。從俊討李成馬進戰于王隆觀。敗之。遷環慶路馬步軍副總管。神武右軍統制。改麟州觀察使。僞齊攻宣化鎮。俊遣宗顏潛渡江。出其後襲之。不勝。俊庇之以捷聞。加沂州防禦使。擊淮北。復遷崇信軍承宣使。撫司前軍統制李家潛之捷。擢龍神四廂都指揮使。武信軍承宣使。紹興八年。知廬州兼總帥事。

敵騎數百抵城下宗顏以騎百餘禦之給曰此張鉄山弟也敵懼而退卒年四十四贈保靜軍節使諡壯敏

趙密字微叔大原清河人用材武試崇政殿授河北隊將戍燕山高宗以大元帥開府徽統先鋒授京師從張俊討李昱俊輕騎先行遇伏密奔射斃數人乃脫擢開門祇候俊初置靖勝軍以密統之平賊董青趙萬徐明轉武節郎左軍統領金兵陷揚州士民數萬隨乘輿渡江密露立水濱厯舟濟之以破苗傅赤心軍敗金人犯明州功進武功大夫陞統制又破李成馬進平張莽蕩賜金帶轉親衛大夫領康州刺史總管涇原馬軍尋詔入衛金犯亳宿從俊出合肥西路時水暴漲涉六晝夜始達論功進協忠大夫和州團練防禦使至宣州觀察使龍神四廂都指揮使主管侍衛步軍海寇朱明暴橫密授張守忠方略曰海

與陸異窮之則日月相持非策之善要在拊定之耳守忠用其計明遂降進定江軍承宣使崇信軍節度使以年勞轉太尉又護顯仁太后撥宮加開府儀同三司代楊存中領殿前都指揮使告老爲萬壽觀使奉朝請隆興二年進少保致仕金復犯淮再起殿前都指揮使敵聲言航海朝諭選從官視舟師撤禁旅防守密不爲動迄如所料和議成罷爲醴泉觀使卒年七十一贈少傅

解元字善長保安軍德清砦人人生而疎眉俊目猿臂善騎射奮起行伍爲清澗都虞候隸世忠麾下擢偏將從出下邳聞金兵大至士民駭愕元領二十騎擒其生口知敵動息俄逢騎數百身自陷陣橫刺敵將墜馬餘皆遁去授開門宣贊舍人臨平浦城戰皆從世忠方邀兀朮歸路以海艦橫截大江金人出小舟

數十以長鉤扳艦元在舫躍入敵舟用短兵擊殺數十人擒其千戶陞忠州團練使爲前軍統制討范汝爲劉忠跨馬涉水薄賊砦四顧周覽得其形勢歸告曰易與爾奪據其望樓則技窮矣世忠然之遣元率兵五百長戟居中翼以弓矢自下趨高賊衆莫支乃據望樓立赤幟四面竝進賊遂敗改相州觀察使世忠命守高郵時城中兵不滿三千金人已至近郊元度明日敵當造城下乃先遣百人伏要路百人伏嶽廟自引四百人伏路隅令曰候敵過我當先出掩之伏要路者視我麾旗則立幟以待敵必自嶽廟走伏者背出遏其歸路翌日悉如所料金萬戶黑頭虎直抵城下伏發進退無路追至嶽廟擒之獲所領兵百四十八人所遺者二金兵復集又戰却之追北數十里赴水死者甚衆改同州觀察使從世忠戰下邳以數百騎破敵伏兵

授保順軍承宣使略地淮陽至劉令莊騎纔三百當敵騎數千
揮戈大呼衆爭奮敵披靡俄而救至後部疑懼元回顧曰我在
此若等無慮衆乃安轉戰自辰至午敵退成列而還加龍神四
廂都指揮使世忠罷兵柄以元爲御前諸軍都統制卽統其衆
屯鎮江明年進侍衛親軍馬步軍都虞候尋授保信軍節度使
卒年五十四贈檢校少保

成閔字居仁邢州人初應劉韜募後從世忠追苗傅及龔兀朮
討范汝爲皆在戎行積功至武功大夫忠州刺史解元至高郵
遇敵水軍夾河而陣相拒未幾遣閔將騎士往援遂大勝俘生
女眞及千戶等復奏奪淮陽門功轉武德大夫由是知名從世
忠入覲世忠言之于帝曰臣在南京自許天下當先使當時見
此人亦須避一頭地上勞勉旋以取海州功擢磁州團練使賜

袍帶錦帛世忠罷兵進棧州防禦使殿前遊奕軍統制主管侍衛馬軍司歷保寧軍承宣使慶遠軍節度使母憂贈鄖國夫人亮將敗盟詔起復提禁旅五萬鎮武昌以禦襄漢上流命湖北守漕多創砦屋三萬間以待閤兵發折帛米錢茶引共百四十餘萬緡義倉和糶米六十三萬石以備軍用仍賜金器劔甲臨遣之至鄂未幾進屯應城除湖北京西制置使節制兩路軍馬兼京西河北招討使詔回援淮西未幾除淮東制置使駐鎮江既又詔閤回駐鄂州亮死金人渡淮北去閤列兵南岸軍士聲相聞金人笑之曰寄聲謝成太尉有勤護送至泗州冒奏克復淮東入朝凡侍從卿監閤門內侍皆有賂正言劉度論劾猶趨拜太尉主管殿前司公事御史胡沂歷數閤二十罪言其贖貨不恤士卒罷太尉婺州居住乾道五年復慶遠節爲鎮江諸軍

福建總管荆南副都統制卒贈檢校少保再贈少傅三子琪順
亦以驍勇聞

弘簡錄卷一百二十

終

弘簡錄

卷一百二十

三
功臣宋七